

# **SA TANG KA JYNJAR LANO YN SUK**



**Da u M. M. Thaïang**

**“İa ka hok long trai la tyngkai da u Nongthoh.”  
“All right reserved by the Author”**



## KA JINGKDEW SLA

1.	Shi Kyntien na u Nongthoh ... ..	i
2.	Ka Lamphrang .. ...	ii
3.	Satang ka jingjynjar lano yn suk ... ..	1
4.	Ka Sngewmiat ka jynrot ka kjat ... ..	2
5.	Ka jingur ka Sngewmiat ha kaba ar sien ... ..	5
6.	U Scibor u wankai sha iing ka Sngewmiat ... ..	8
7.	Ka Sngewmiat ka phah warta sha ka Sngewbha	10
8.	Ka Pdianghun ha iing ka Sngewbha ... ..	12
9.	Ka Pdianghun bad u Nangbha... ..	14
10.	Shah beh ka Pdianghun na iing ka Sngewbha...	17
11.	Ka Pdianghun ha iing u Nangbha ... ..	20
12.	Ka Teilang ha iing ka Pdianghun ... ..	22

\*\*\*\*\*



**“Ia ka hok long trai la tyngkai da u Nongthoh ”**  
**“All right reserved by the Author”**

## SHI KYNTIEN NA U NONGTHOH

Ka thoh ka tar ka long kum ka Television ne ka itdorbin ha kaba kiwei pat ki jaitbynriew ki peit bad bishar ia ka jingnang jingstad bad ka jingiaid shaphrang jong kano kano ka jaitbynriew. Nadeuh ba ka jaitbynriew Khasi Pnar jong ngi ka don la ka thoh ka tar kaba thikna, ki nongthoh kot la ha ka ktien Khasi - Pnar ne Phareng ki la nangmih ter shiter na ka por sha ka por.

Kum ka jingnoh synniang lang ha ka thoh ka tar Khasi-Pnar, nga sngewkmen ban pynmih ia kane ka kot "SATANG KA JYNJAR LANO YN SUK" bad nga ngeit ba kane ka kot kan pynaram, pynjahthait jah jrem bad pynpuson ia ki nongpule. Ym lah ban len lehse ki don ki jingbakla hangne hangtai ha ka rukom spel dak ne pyniasoh ktien, nga ngeit ba ki nongpule kin ym sngew eiei bad sngewbha ban pynbet.

Nga sngewnguh ia ka Arts & Culture Department, Government of Meghalaya, kaba la iaram bad pynshlur ia nga ban thoh kot.

Nga pynpaw ruh hangne ia ka jingsngewnguh kaba kyrpang eh ia u Ma Mongols. S. Tangkra, MDC, Narpuh bad ia ka jing ka sem jong u, kaba la nohsynniang ha kaba pynmih ia kane ka kot. Ka jingsngewnguh ka leit ruh sha u Ma Dap S. Dhar uba la type ia ka manuscript, ia u Ma Charles C. Phawa uba la buh ryntieh (Setting). Ngam lah khlem da pynpaw ia ka jingsngewnguh ka ba kyrpang ia ka kmie ki khun, ia ki khun bad ki ksiew jong nga kiba ai mynsiem ia nga ban thoh kot.

*Dated: Mookyrdup  
December 11, 2008*

*M. M. Thiang  
Mookyrdup, Jowai.*

## KA LAMPHRANG

Ha kane ka kot nga la ringdur na kawei ka khynnah khunswet kaba la iap kmie kaba im tang ha ka jynjar bad ka jingjaw ummat.

Ki longshwa manshwa jong ngi haba ki ai ia kano kano ka jingsneng jingdraw ia ki para, ki pyrsa bun sien kim ju kren beit beit ha ka phang kaba ki dei ban kren, hynrei ki da ka khana da ka parom ne da ka jingkren ha ka dur pharshi kaba iahap tar, hapdur hapsur bad ka phang kaba i mut ban kren.'

Kane ka rukom kren ha ka dur pharshi ym tang kaba pynsgewtynn timer ia ki nongsngap, hynrei ka pynngam jylliew ruh ha ka jingmut jingpyrkhat jong ki nongsngap. Kane ka rukom sneng rukom kraw ne kyntu kynpham da ka jingsiat pharshi ha ka dur bapher bapher ka long kaei kaei kaba sngewtynn timer hapdeng ki khun ki ksiew u Hynñiewtrep u Hynñiewskum.

Ha kane ka kot don lai tylli ki 'tienpyrkhat ne ki mat puson. Kawei ka long ka jingbymkohnguh sneng ka Sngewmiat ia ka sneng ka kraw ka hynmen jong ka, ka Sngewbha. Kaba ba ar ka Pdianghun, ka khynnah khunswet kaba la iap kmie kaba im tang ha ka jynjar bad ka ba lai ka Sngewbha kaba iohi tang ia ka jingbakla jong kiwei kat ba ia ka jinglong jingman jong ka khun la jong pat kam tip eiei.

Kane ka parom kaba don ha kane ka kot, ka shong ha ki nongpule ia ka, kiba dei ki 'riewpyrkhat ba kin ngam jylliew sha ki thweibah thweisan jong ka parom bad ba kin ring jingmut hi ia ki mat ki jura kiba don ha kane ka kot.

Ka Pdianghun ka dei ka khun jong ka Sngewmiat. Ka Sngewmiat hadien ba kə la kha ĩa ka Pdianghun ka khun kynthei kaba bha briew jongka, hynrei na ka daw ki jingklusai ki ba bun jait, ka la kem pang bad khladnoh na kane ka pyrthei.

Ka Sngewbha, ka meiheh jong ka Pdianghun, ka don arngut ki khun kynthei ka Teilang bad ka Lumlang. Ka Sngewbha wat lada ka la kular ha khmat ka kmie jong ka Pdianghun, ha shwa ba kan dkut mynsiem ba kan ri ban sumar ĩa ka Pdianghun kum ka khun la jong, phewse kam shym la long kum ba la kular. Ha ka jaka ba kan niew ĩaka Pdianghun kum ka khun kaba mih na ka doh na ka snam lajong, ka la ĩiew pynban ym tang kum ka shakri, hynrei la kum ka mraw. Ka Pdianghun bapli, ka khunswet kaba la ĩap kmie, ka im ka jingim kaba sohsat ha ka jingjynjar, ka jingklusai bad ha ka jingjaw ummat; Hynrei pat ha kaba khatduh ka ioh jingsuk da ka jingbtin lynti Uba na jrong, Uba na tbian, Um shym la iehnoh ĩa ka bad ha kaba khatduh ka ioh jingtngen jinghun bad ioh jingsuk.

Shuh shuh ha kane ka kot, ka Sngewbha kaba don arngut ki khun kynthei, ka Teilang bad ka Lumlang. ĩa ka ĩaid ka ĩeng jong ka Pdianghun ka peitsiar, ka lorni bad ka iohi ĩa ka jinglong jong ka, katba ĩa ka jinglong jingman ka khun jong ka, ka Teilang, wat lada la san bnai i khun ha kpoh kam tip eiei. Ka Sngewbha ka iohi tang ĩa ka khun kiwei kat ba ĩa ka jinglong ka khun lajong pat kam tip ei ei.

Nga kyrmen ba ki jingthoh kiba don ha kane ka kot lyngkdop kin long ki ktien-pyrkhat lane ki mat puson ĩa baroh ki nongpule ĩa kane ka kot.

M.M. Thaiang  
Mookyrdup, Jowai.

## SATANG KA JYNJAR L'ANO YN SUK.

Shisien ha kawei ka por ha shnong Umtyrtah, la don arngut shipara ki khunswet, kiba la iap kmie iap kpa. Ia ka khun kaba nyingkong lætip kum ka Sngewbha bad ia kaba ar la tip kum ka Sngewmiat. Ka Sngewbha, ar bnai shwa ban khlad l mei l pa ka la dep iathoh shongkurim katba ka Sngewmiat ka dang dei ka samlalud bad kaba dang pule ia ka first year B.A. ha Umtyrtah University Autonomous College.

U kurim ka Sngewbha, u dei uba trei kam ophis bad uba trei sha palat shnong. Namar ba u dei u briew uba trei kam sorkar, ka enleave kaba u la shim lai bnai ka la kut noh. Ka Sngewbha wat lada ka dang dei ban sah sa katto katne sngi ban pyntngen bad pynshngaiñ iala ka para, pynban ka la dei ban iehnoh marwei ia la ka para bad bud ia la u jong uba ieid uba trei sha palat shnong bad ka la hap iehnoh marwei ia la ka para ban sah ha iing.

Ka Sngewbha, ha shwa ba kan mih na iing, ka la sneng ka la kraw bad kyntu kynpham iala ka para ba kan husiar bha ialade ban ym die tat iala ka burom ka akor bad ban ym kynrup ruma ia uno uno u shynrang briew, hynrei da peit bniah bha ioh kan babe pat hadien. Nga ruh ka la ong "lada nga shem ia u briew u babha ka jinglong ka akor, uba tipbriew tipblei, uba tipkur tipkha, uba tiplok tipjor bad uba smat uba sting ha ka trei ka ktah te ngan aiktien pat sha phi" la pynkut ka Sngewbha. Nangta shuh shuh ka la ong wat ym kyrkieh ban wad briew to nangpeit ia ka iing ka sem, ia ka kper ka phrah, ia ka bri ka khyndew, ia ka pynthor ka bhin bad nangpyndep shwa ia ka jingpule B.A, khnang ba phin suk ka wad kam sorkar bad ba phin long briew lashai la shisngi, la kyntu ka Sngewbha.

Ka Sngewmiat, ha ka jingsah khunswet marwei ha iing ka la hap ban peit ia ka iing ka sem, ia ki sniang, ki syiar, ia ka kper ka phrah, ia ki hali ki pynthor bad ia baroh ki jingdon jingem kaba la iehap ki kmie ki kpa. Ha ka jinglong khunswet bad ha ka jingkhia ka kam iing kam sem, kam plie lad plie lynti shuh ba kan nangbteng ia ka jingleit skul ban pyndep ia ka B.A jong ka.

## **KA SNGEWMIAT KA JYNROT KA KJAT BA KUM IUH IA KA SNEPKAIT BA BRET KI BRIEW.**

Ha kawei ka sngi iew, ka Sngewmiat ka leit iew sha Jrikyndeng ban thied jingthied ban ioh bam taiew. Tang shu mar ia dep ka thied ka pet, ha shwa ba kan khreh ban wanphai sha la iing, kyndit kynsan wan u 'lappraw uba jur bha la kum ba theh na ktang. Namar ba slap katba ka dangwanphai, hapdeng lynti ka la kum iuh ia ka snepkait [Snieh - ladaw] ba bret ki briew, ka la btuit bad kyllon kram haduh ba ym lah khie shuh bad ka la iam ka la ud marwei iala ka nusip jot. Ha kata ka jingur kam lah leh eiei shuh, ka la shu thiah kylla lyngkdang lyngkdang, pyllup pyllup, donbok ba ha kata ka por jia ryngkhat ba uwei u samla briew uba dei iaaid lynti nangta, haba u la iohi u la sngewisynei ia ka. U la pyrshang ban iarap ia ka ba kan iaaid, hynrei ka Sngewmiat kam lah kyrda shuh ialade bad artat ba kata ka kjat ka mon kaba la jynrot bad laitdoh ka la nangat nangat arshah. Uta u samla uba dap da ka mynsiem sngewlem, u la sngewsynei ia ka bad haba u la pyrshang ban pynieng kam lah iaaid shuh, u la bah ia ka shisyndon haduh ba kan da poi ha tyngkong iing jong ka. Ha kata ka sngi ka Sngewmiat, namar ba jur ka jingsuh jingthar, ka jingdait jingsip kata ka kjat bad ka iam artat, kam lah ban kem bad kynmaw ia ka durkhmat jong uta u samla uba la kit la bah ia ka. Uta u samla ruh ha ka jingkyrkieh kam ban poi sha shnong Pdengchyrgan artat ba la kem fongreifi bad ba ka sngi ka la noh, ba ka jingiaid lynti kaba dangjingai, u tang shu pynhiar ia ka Sngewmiat top ha tyngkong



ŕing, u ŕeng shiphang arphang haduh ba kan da rung hapoh ŕing bad u leitnoh artat.

Ka Sngewmīat, kaba la ktieh bad jhieh baroh shiryngieng, tang shu pynhiar uta u samla, ka la par shisyndon shapoh ŕing ban kylliang jaiŕ kylliang ki sopti da ka jingpyrkhat ba hadien ba la dep kylliang jaiŕ malu mala kan sa mih ban khot ŕa u ta u nongbah nongkit bad u nonglehbha ba un rung hapoh ŕing bad la kumno kumno kan ai ki kyntien sngewnguh ne shi pela sha lane shikyntien kwai, phewse haba ka la mih shabar ban khot ŕa u, pynban u la leitnoh. Ka Sngewmīat, ka la sngewsih kthang hala ka mynsiem ba kat ŕa u nonglehbha jong ka, kam iohlad ban pynpaw ŕala ka jingsngewnguh lane ban ai tang shikyntien kwai. La katta ruh ka ong halade ba lada kan ŕa kynduh ŕa u ha kano ma kano ka por bad ka jaka kan ai da ino re ino ŕjingai sngewbha kum ka dak ka jingsngewnguh iala u nonglehbha uba la kit la bah ŕa ka na ka jaka ba ka ur, ba ka kum ŕuh ŕa ka snepkait ba bret ki briew, haduh ban da poi ha ŕing.

Ka Sngewmīat, kaba la jynrot bad laitdoh ka kjat ka mon ha kata ka jingur bad ha ka jingsuh jingthar kam shym la iohthiah baroh shimiet. Ha ka jingbymiohthiah bad ha ka jinglong khunswet tuid ki umkhmat baroh shimiet na ki ngap jong ka. Ha ka juh ka por ka kynmaw ŕa ki sngi kiba la leitnoh haba ka dang don hapneh i mei i pa bad ka da ong artat halade “Ah! ba ngan dang don la imei ipa haba jia kumne, kine kynrot hajan jong nga ban syrput syrpai ŕa nga”.

Ka Sngewmīat, ka dei ka samlalud kaba smat kaba sting bad ka bymjuih thiah sngi. Man ka sngi shwa ban khie thiah ki briew, katai ha mynshem ka sar, ka pynkhuid ŕa ki sladieng slasiei. Kij wanrah ka lyer najan bad na jngai sha mynshem ŕing jong ka, hynan ka Sngewmīat hadien ba ka la wan na ŕew Jrikyndeng, ki marjan

**ŋing ki marjan sem ki sngewphylla ba kim iohi shuh ŋa ka ba ka mih shabar ban sar ban pynkhuid ŋala ka mynshem bad haba kim iohi shuh ŋa ka, ki la wan jngoh bad ki la iohi ba kane ka Sngewmiat kynret ha jingthiah ba kam lah leh eiei bad kata ka kjat ka mon kaba la jynrot bad laitdoh ka la at bad ka la nangat arshah.**

**Ha kane ka shnong Umtyrtah, donbok ba don uwei u Kabirait uba nangbha ban khem bad ai dawai haba jynrot bad laitdoh ki khun ki briew. Ki marjan ŋing ki marjan sem ki la ŋarap ŋa ka Sngewmiat bad shduh lane kyrshan ŋa ka, man ka sngi ba kan poi sha ŋing u nongkhem bad ai dawai. Tang hapoh shitaiew ka jingsumar, kata ka kjat ka la jem, ka jingatsamtameh ka la jah bad ka la lah ban ŋaid ban ieng kumba mynshwa.**

**Ha kawei ka sngi synrai kaba syaid bha ka sngi, katba ka dangshong thatsngi ŋala u sniuh hadien ba ka la dep sum, ka pyrkhathalade weibriew bad kynmaw khlek sha ka jingsneng jingkyntu ka hynmen jong ka, ka Sngewbha, ha shwa ba kan mih na ŋing ban bud ŋala u jong uba ieid uba trei kam sorkar sha palat shnong. Ka Sngewmiat, ka kren halade weibriew “Hato nga lah mo seh ban shongsamla bad ap haduh ban da wad briew I hymen ŋa nga?”. Ka Sngewmiat, ka ong halade “Tharai lada nga ŋoh ŋa u briew uba bha, uba donburom, uba tipbriew tiplei, uba tipkur tipkha bad uba smat uba sting kan ym sngew eiei ŋa nga”. La katta ruh ka la ong “Nga ngeit skhem ba Uba najrong na tbian hi Un ŋalam lynti ŋa nga”.**

**Katba ka dang shong pyrkhathalade weibriew, ka por ka la nangŋaid, ka sngi ka la kynrong sngi. Haba ka Sngewmiat ka peit sha ka Baje, ka por ka la ŋaid stet la shiphew shiteng. “Ani wow! nga la slem” ka la ong bad mar mar ka la khreh la u khoh u star ban leit peit ŋa ki hali ki pynthor kiba kam ŋohpor ban leitjngoh leitkhmih naduh ba la dep thung dep tep.**

## KA JINGUR KA SNGEWMIAT HA KABA ARSIEN

Hapoh shnong Umtyrtah, ki don shibun ki dukan ha kaba lah ban ioh ia baroh ki marbam mardih, hynrei ka dor pat ka long arshah haba ia nujor bad ka dor iew dor hat. Ha ka sngi kaba bud ka Sngewmiat, ka khreh ka khrum la u khoh u star, ka trap [Shaladiang], kem katto katne tylli ki syiarlud bad thep ha Ruh ban leit sha iew Raliang. Ha kane ka sngi tang mar shu ia dep die ia ki syiar, hamar ba ka khreh ban mih iew ban thied jingthied jingbam taiew, kyndit kynsan ka jingtied pyrthat bad wan u 'lappraw uba jur la kumba theh na ktang. Ka Sngewmiat, ka la pyrshang ban ap shiphang arphang lane kumba shikyntien kwai, hynrei u slap um shym la duna. Lada ka ap haduh ban da rang u slap kan lap ka miet ia ka ha lynti, kumta ka mih la ka mih iew khnang ban dep kloï ka kam. Ha ka jingïathynñian briew, kiba thied kiba pet, kumno re kumno boh u Knup u Seibor ia ka Trap [Shaladiang] jong ka Sngewmiat na shadien tiak. "Ani! wat sngew eiei ho kong" la ong u Seibor, ka Sngewmiat pat ka sngap la ka sngap khlem da pynphai ktien wat shikyntien ruh.

Ka Sngewmiat, hadien ba la dep ka thied ka pet ia ki marbam mardih bam taiew, ka dihsha shipela, ka check ia ki tiar ki tar sa kiei de kiba dang donkam ban thied bad haba la biang ka iengjoit bad wanphai noh sha la shnong. Namar ba ka dei ka por lyiur katba nangïaid u slap u la nangjur nangjur ha ryngkat ka jingdum ka suiñbneng bad ka tied pyrthat. Ka jingkit bam taiew kaba khia sa ba tler [btuid] ka lynti khlaw, ka Sngewmiat, ka hap ban ïaid suki suki jai bad kyrshan ïalade da kaba bat artat lynti lynti ia ki 'langmet ban ym ur bad btuid ha kata ka lynti khlaw. Ha kata ka jingïaid kaba da antat ban kam, kata ka kjat ka mon kaba la jynrot bad laitdoh mynba hynriew bhai mynshwa ka la khiih jynrot biang bad ka la dei ban ïaid shupar.

Ha kata ka sngi, u Seibor, u samla briew uba woh ka tdong knup ha ka Trap [Shaladiang] ka Sngewmiat, uba dei ïaid lynti na Umtyrtah sha Umdait-thah, u la ïa kynduh ngong ïa ka Sngewmiat hapdeng lynti bad u la kylli artat. “Wa ka jia aiu ïa phi kong?” Ka Sngewmiat, ka la jubab. “Ani! phi bah sangsot ïa nga ba ka la khiih biang kane ka kjat k’u mon kaba la jynrot mynba hynriew bnai mynshwa ba nga ur ha lynti ïew Jrikyndeng ba nga kum iuh ïa ka snepkait ba bret ki briew katba nga dang wanphai na ïew Jrikyndeng bad mynta nga sngew tang ban ïaid bha ruh ngam sngewlah shuh, tip ngan leh kumno keiñ, ka pynhiar artat ïa ka khoh bad ka shong artat phñion harud lynti.

U Seibor, u samla briew uba dap da ka jingïeid bad ka jingsngewlem ïa ka, u la kylli. “Hato phim sngewlah shuh mo seh tang ban ïaid dkoh ruh ne phi sngew kumno?”. Ka Sngewmiat, kala ïathuh ba ka sngewpang eh, hynrei la katta ruh ka ong ba kam lei lei bad kan shu ïaid suki da par. U Seibor u bat ïa ka khoh bad u shong phñioñ hajan ka Sngewmiat. Hadien ba u shong shiphang apshang bad ba um kwah ba kane ka samla-lud kan lap ka miet ha lynti, shisyndon u kit ïa ka khoh bad btin ïa ka Sngewmiat haduh ba kan da poi ha ïing. U Seibor, namar ba dang jngai ka lynti kaba u dei ban ïaid, u tang shu dep pynhiar ïa ka khoh ha tyngkong ïing ka Sngewmiat bad hadien ba u ap shiphang u la leit noh artat. Ka Sngewmiat ka la kyrpad ïa u ban ap haduh ba un da dep dihsa bad bam shi kyntien kwai, hynrei um treh shuh naba u kyrkieh ba u dei ban poi dang kham shai ha Umdaitthah. To lada phim treh dihsa shuh te khublei shibun eh ho bah, la ong ka Sngewmiat. “Ngam tip shuh kan jia aiu ïa nga ha lynti lada phim don ban btin lynti” la ong shuh shuh ka Sngewmiat. “Da ei bah ngan siew kylliang namar ka jinglehbha jong phi ïa nga”, pynpaw jingsngewnguh ka Sngewmiat.

U Seibor, uba kyrkieh ban leit ba dang jngai ka lynti ïaid u ong “Ym leilei phi kong ïa kata bad kaei hi ruh kata kaba phin ai sngewbha ïa nga, to koit ym lei lei, kaba sngewkmen ka long ba phi la poi ha ïing” ong uSeibor. “To ap seh” (to ïangmat rieh ioh me u dih tang chi khuri ka sha soow) kyrpad ka Sngewmïat. “Em phi ka la miet ngam dih shuh” ong u Seibor “ngin sa ïa kynduh pat”, bad u leit noh artat.

Hadien ba la leit noh u Seibor, ka Sngewmïat, ka babe ba kam shym la kylli ïa ka kyrteŋg jong u, uba la ïarap ban kit ban bah ïa ka khoh jong ka bad btin lynti ïa ka haduh ba kan da poi suk ha ïing. La katta ruh ka ong halade, “Lada jia ba ngan ïa kynduh ïa u sharum shaneng wat lada ngam tip ïa ka kyrteŋg jong u ruh, hynrei nga dang kynmaw hi ïa ka durkhmat jong u bad ka dei ka kamram jong nga ban kren ban pynpaw ïala ka jingsngewnguh ïa u kum u nonglehbha u nonglehkam isynei ïa nga”.

Hadien saw bnai jia ryngkhat ha kawei ka sngi ïew Musiang ha Jowai, katba u Seibor, u dang ïaid ban wad Duma smuk u kum ïa tyngkhuh nadien ïa ka Sngewmïat, kaba dang bun kam ha ka siew ka tda baiktung. Ha kane ka jingïatyngkhuh baroh arngut ki la saw treng bad ki la pan map markylliang ïala ka lait ka let.

Katba ki dang ïapeit iwei ïa iwci pat, Seibor u kynmaw liak “imat dei kane ka briew kaba u la bah ïa ka ha ka lynti ïew na Jrikyndeng sha Umtyrtah bad kane ka juh ka briew kaba nga la kit ïa ka khoh jong ka bad btin ïa ka na lynti ïew Raliang sha Umtyrtah ha ka por ba nga leit donkam sha Umdait-thah lyngba ka shnong Umtyrtah”. Ha ka juh ka rukom na ka liang ka Sngewmïat ruh ka kynmaw thik ba ym lait shuh ba dei une u briew uba la bah bad btin ïa nga ha ka jingur jingpat jong nga ha ka lynti ïew Jrikyndeng bad ha ka jingjynrot bïang ka kjat ka mon jong nga katba nga dang

wanphai na i'ew Raliang sha Umtyrtah. Ha kane ka jing'akynduh ki la sdang ban i'a kylli kyrteng, kylli kur kylli jait bad kylli shnong artat iwei i'a iwei pat. Hadien ka jing'apynithuh ithaw baroh arngut ki la sngewkmen haduh katta katta ba ki la ia kynduh.

Hadien nangta u Seibor, u la khot ia ka ban ia leit dih sha, bad ki la i'a rung dihsha ha kawei ka dukan sha ha khlieh i'ewmusiang. Ha kane ka jing'adihsha, u Seibor, u pynpaw ha ka Sngewmiat ba u kwah ban wankai sha i'ing jong ka ha kano kano ka sngi kaba un leit donkam sha shnong Pdeiñchyrgan. Na ka liang ka Sngewmiat, ka la pdiang sngewbha da kaba sngewkmen i'a kane ka jingkwah jong u Seibor, ban wankai sha i'ing jong ka. Hadien ka jing'adihsha baroh arngut ki i'a leitphai sha la ka jong ka jong ka lynti sha la shnong.

## U SEIBOR U WANKAI SHA I'ING KA SNGEWMIAT

Hadien shibnai eiei, u Seibor, u wankai sha i'ing ka Sngewmiat. Tang shu i'a kynduh kem ka jingieid i'a kine baroh arngut. Hadien kumba arkyntien kwai sdang mih ki sur jem ktien. U Seibor, u sdang sa ka syrpuð syrpa i'a ka Sngewmiat. Ki marjan i'ing ki marjan sem kiba sngap kiba sngew i'a ka jing'akren jong ki, ki i'ohsngew da ki sur jemktien mar i'a jem ktien khlem tam khlem duna la kum kiba kha bynrap. Katba nang i'a kren hangta sdang ban mehding ka jing'iaeid. Ki kyntien bang ki kyntien thiang jong u Seibor, ki dung khak ha u klong snam jong ka Sngewmiat. Haduh katno keiñ ka Sngewmiat kan lah ban tyngkan i'alade bad kynmaw i'a ki kyntien sneng kyntien kraw ka hynmen jong ka, ka Sngewbha, ha shwa ba kan mih na i'ing ban bud i'ala uba ieid uba trei kam sorkar sha palat shnong? Ka jem khnep la kum ka Wang shohsngi. Shaei pat kein baroh arngut mar ka juh ka jingsngewthuh, ka jingmut jingpyrkhat ruh ki i'a tyngkhuh mar ka juh.

U Seibor, u dei u khun riewspah ki brierw. Hadien ba la pynpunkhun ia ka Sngewmiat, u la lehbeiñ ia ka bapli. Kawei ruh namar ba ka dei ka khunswet bad ka brierw kaba duk. Ka Sngewmiat wat lada ka la iashong iasah bad u Seibor pynban kam shym la nud ban iathuh ne pyntip ia ka hynmen jong ka, naba ka tieng ba iohlehse kan dom kan bitar ia ka, namar ba kam shym la kohnguh ia ki jingsneng jingkraw jong ka, kiba ka Sngewbha, ka la pyni pynkdew ha shwa ba kan mih na iing ban bud iala uba ieid (kpa ki khun jong ka) uba trei kam sorkar sha palat shnong.

Ha dien lai bnai wan mih u Seibor sha ka Sngewmiat. "Seibor balei phi slem ban wan?" (Seibor iukhih wa slem me u wan?) La kylli ka Sngewmiat. "Nga bun kam shaba palat, shuh shuh ha kine ki lai bnai ba ym don i pa ha iing nga hap don ma nga ban siew bainong ia ki nongtrei" la jubab u Seibor. Nangta ka Sngewmiat ka ong shuh shuh. "Shyrkhei wa lang-a o, jhan o u wan me, tip hi mi iyie wajia ia nga?". "Iukhih pha, em re u sngiawshait pho?" la pynphai ktien u Seibor. "Chait pathan chait bait o", la ong ka Sngewmiat. "Iukhih theit pha myntae?" La kylli u Seibor. "Wa da arpran o" (nga la armet) iathuh ka Sngewmiat. "Da arpran pho....?, Ngam ngeit", la ong u Seibor. "Iukhih ong mae kamtae, hawa ap kamtae tae dur hi rae u ngait mi", la ong ka Sngewmiat. "Ngait hi o rea watoh da nga", la ong u Seibor. Ba ita i khunlung iba ka Sngewmiat ka la pun ka la seng ha kpoh ba i dei na u.

Ka Sngewmiat, haba ka la ioh ia ka jubab kaba kum kane na u Seibor, kala iam bad ka da ong artat "To lada phim ngeit ba ita i khunlung iba la seng i dei na phi, yn ong pat da kumno bad tang u Blei uba tip", la pynkut ka Sngewmiat. Shuh shuh u Seibor u la ban shi-iai-ban ba lada ka Sngewmiat ka iathuh kaba iathuh ruh um ngeit ba ita iba ka (Sngewmiat) la pun, ka la seng ba

i dei na u. U Seibor, u ieng joit bad u leit noh artat khlem da wan phai shuh sha ka Sngewmiat.

Tang shu ieng joit u Seibor, ka Sngewmiat ka la ong “Seibor wat ym pat leit, ap shwa wat ym leit” Hynrei u Seibor um pynsngew ei ei u leit la ka leit. Haba ka Sngewmiat ka iohi ba u Seibor, um pynshah shkor ei ei ia ka jingkyrpad jong ka, ka iam bad ka shu pynbud tang da ki kyntien, “ To lada lai mi leh, ngoohblai wan ioh O u khasuk khasain, hon paia kat itu i kular mi ia nga han paia du kamni hi eh....to pher rea.. dih lai suk mi myntea”. Ka Sngewmiat ka iam pangnud hala marwei ia la ka nusip jot da kaba ong, “Ah kam nga ni du jynjar mynnu u chem yeisuk”.

Ka Sngewmiat, ha ka por ba ka kha ia ita i khun kynthei iba bhabriew bad iba nyngkong jong ka, ka hap ksaid hap kha marwei. Hadien ba la kha ia ita i khun kynthei iba bhabriew kala ai kyrteng ia i “Ka Pdianghun”. Wat hapdeng ka jingduk tasam pynban kala ialah shitom ban phah skul iala ka khun.

## **KA SNGEWMIAT KA PHAH WARTA SHA KA SNGEWBHA**

Tang hadien katto katne snem ba la kha ia ka Pdianghun, ka Sngewmiat, na ka daw ki jingklusai ba bun jait ka la kem pang bad haba ka la sngewthuh ialade ba ka jingpang kam ailad shuh ia ka ba kan dangim ha kane ka pyrthei, kala phah warta sha la ka hynmen bad sha u kong jong ka u Heibormi, ba kin wan jngoh ia ka. Namar bala jur lypa ka jingpang, sniewbok ba ym don lad shuh ban wad ki lad ki lynti ba kan ioh biang ia ka jingkoit jingkhiah. Tangba shwa ba kan dkut mynsiem, kala pan map nala ka hynmen bad u kong jongka ia ka jingtam sneng jong ka. La katta ruh ha shwa ba kan dkut mynsiem, ka la kyrpad ia la ka hynmen ba kan ri kan sumar lem ia ka Pdianghun, ka khun jong



ka. Ka Sngewbha ruh ka da kular skhem ha khmat ka Sngew miat ba kan ri kan sumar, ban peit ban khmih bad ban pynleit skul ia ka Pdianghun.

Shuh shuh ka Sngewmiat, haba ka la sngewthuh ba ka jingpang kam ailad shuh ia ka, ba kan dang im, ka la kyrpad jur ia la ka hynmen da kine ki kyntien "Sanpun, sngewbha ban ri ban sumar ia ka Pdianghun, sngewbha wat ym lehbein ia ka mo-mo-mo, sanpun a-a-a- sanpun ngam im shuh da rap kattu".

Ka Pdianghun, haba ka la roh sngew ia kine ki kyntien kiba mih na shyntur i mei jong ka, ka dem khруп ha met i mei bad ka da ong artat "Mei-mei wat ieh khunswet ia nga, mei, mei wat iehnoh ia nga mei, pleng da kumne phin iehnoh ia nga tang shiteng por seh mei?. Mei mei mano keiñ ban peit ia nga mei?. Oh! mei baieid, phin iehnoh mo seh ia nga mei?". Ka da iam artat.

Ka Sngewbha (ka Meiheng jong ka Pdianghun) kaba don hajan ka la pyntngen ia ka Pdianghun da kaba ong "Khun khun wat iam, ym dei tang phi kaba sngewsih, nga ruh nga sngewsih lang, "En khun, en wat iam, ngan peit ngan khmih, ngan ri ngan sumar, ngan bsa ngan bsiap bad ngan pynleit skul ma nga ia phi. Nga ruh nga dei i mei jong phi, en khun wat iam". Shuh shuh ka Sngewbha, ka da ong "Ka Sngewmiat ka la dei ka sngi ba ka la kut ka por ba kan leit noh, kumta to en noh khun wat iam, to en noh".

Hadien bala dep thang, dep pynkhuid, ka sait iing ka sait sem, da khaiimiet khaiisynnua, ka Sngewbha, u kpa ki khun bad ka Pdianghun ki la khreh la khрум ban leitnoh. Haba ka Pdianghun, ka la dep ka khreh ka khрум ka pynlum ka pynlang ia ki jaiñ ki nep, ki kot ki sla bad ia ki tiar ki tar kiba donkam ki la mih bad leitnoh artat na shnong Umtyrtah sha palat shnong.

Ka Sngewbha, ka don ar ngut ki khun kynthei kaba nyingkong ka Teilang bad kaba ar ka Lumlang. Ka Sngewbha ha ka jaka ban ñiew ña ka Pdianghun kum ka khun la jong kat kum ka kular jong ka hakmat ka Sngewmiat, ha shwa ba kan dkut mynsiem bad khladnoh na kane ka pyrthei, kala ñiew pynban ña ka Pdianghun, ym tang kum ka shakri, hynrei la kum ka mraw.

## KA PDIANGHUN HA ÌING KA SNGEWBHA

Baroh ki kam ìing kam sem la bynshet ha ka Pdianghun. Ka Pdianghun kaba ym ju myllien ha ka shet ka tiew, ha ka saiñ ka sdieh kat kum ka rukom sor, kam tip bad kam nang ban shet ban tiew bad ban khreh bam khreh dih, kumta bunsien ka shah mai shah kynthit ha ka Teilang, ha ka Lumlang bad ha ka Meiheh jong ka, ka Sngewbha. Teng teng haba khaw ot ka ja, ki tim ki tla, ki khyrniom bad shoh bad dat ña ka Pdianghun. Ha kum kine ki khep, ki ummat ki tuid bad ki jaw brop shibrop na ki ngap jong ka Pdianghun bad ka da ong artat “Ah! kum ma nga ka shempap lada dang don i mei kan ym wan jia ña nga kumne. Ha ka jingshisha haba ngam nang ña ka trei ka ktah, ka shet, ka saitjaiñ ka saitnep, ki la dei ban pyni ban pynkdew ba ngan nang ba ngan tip, hynrei pleng da kumne”, ka la ong halade. “Ah! ka nusjp jot ña nga. Satang ka jynjar lano yn suk?” Ka la ong ha ryngkat ka ñam bad ka jingjaw ummat.

Ka shuti tlang ka la kut, ka la dei ka por sdang skul. Ha ka jingshisha ka Pdianghun, ka la dei ban leit skul lang bad ka Teilang bad ka Lumlang man ka sngi, pynban ña ka Pdianghun la phah skul tang shisien shi-taiew. Lehnohei ka jingkular skhem ka Sngewbha, ha khmat ka Sngewmiat, ha shwa ba kan dkut mynsiem ba kan pynleit skul ña ka Pdianghun bad ba kan ñiew ña ka kum ka khun la jong. Ka Sngewbha (ka Meiheh jong ka Pdianghun) ha ka

jaka ba kan ñiew kum ka khun lajong, ka la ñiew pynban ym tang kum ka shakri, hynrei la kum ka mraw. Ha ka jaka ban phah skul man ka sngi, la phah ña ka tang shisien shitaiew bad ruh ka dei ban pass bha bad lada ym pass yn pynshitom ña ka.

Ka Sngewbha, ka don arngut ki khun kynthei, ka Teilang bad ka Lumlang pynban ña baroh ki kam ñing kam sem, ka sar ka pynkhuid, ka saitjaiñ ka saitnep, ka shet ka tied bad kiwei de ki kam ñing la phah leh ha ka Pdianghun marwei. Ka bapli ka Pdianghun, kam don por ban shongthait ka hap trei naduh dangstep haduh ban da miet. Ka bam ka dih ruh ka ioh tang ña kaba tam bad kaba la tam kyntait. Ka jingbymbiang ka bam ka dih, ka thiah ka dem ka Pdianghun, ka dap satang ka jingjynjar bad ka jungkhuslai. Ha kum kane ka khyllipmat, ka Pdianghun kam lah khlem da phaidien sha ki sngi kiba ka dang don hapneh i mei. Ka rwai sngewsih marwei haduh ban da jaw bad tuid ki ummat na ki ngap jong ka. Durlanot ña ka bapli ka Pdianghun ba kam shym la long kumba la kular ka Meiheh jong ka ha khmat i mei jong ka, ha shwa ba kan dkut mynsiem bad khladnoh na kane ka pyrthei.

Ki nonghikai ha skul, kiba shim kyrteng man la ka sngi ña ki khynnah skul, ña kiba wan bad ki bym wan, ki sngewphylla bad lyngngoh ña ka Pdianghun ba kam ju wan skul thikna bad kaba wan tang shisien shitaiew. Na ka liang ki nonghikai, ki la pyrshang ban kylli bad wad ña ka daw ka jingbym wan skul jong ka, hynrei kam shym la ña jubab eiei. Ha ka juh ka por ruh ka Pdianghun, kam shym la nud ban ñathuh ña ka daw naba ka tieng ña ka Sngewbha, ka Meiheh jong ka.

### **KA PDIANGHUN BAD UNANGBHA.**

Ka Pdianghun, ka long ka khynnah kaba stad bad kaba proh jabieng. Ha ka jingleit skul kaba tang shisien shitaiew pynban ha ki examin kam juh fail ne sah klass bad man ka snem ka kiew na kawei ka klass sha kawei ka klass. Ha ka

jingleit skul kaba tang shisien shitaiew, ka Pdianghun kam don paralok kumba long kiwei kiwei ki khynnah bad ka hap iaid hap ieng marwei. Wat ki hynmen arkmie jong ka, ka Teilang bad ka Lumlang ruh ki iaid kiar bad lehmyneh kum bym ithuh ia ka Pdianghun. La katta ruh u Nangbha, uba ia shonglang ha ka juh ka ben haba ka wan skul shisien shitaiew ka la ithuh ithaw bha. Kane ka jingia-ithuh ithaw katba nangiaid ka por kine baroh arngut, u Nangbha bad ka Pdianghun ki la kem jingieid iwei ia iwei pat.

U Nangbha, u dei u khun ba marwei jong ki kmie ki kpa kiba don kiba em. Haba u Nangbha, u la tip ia ka jingshem pap jong ka Pdianghun, ka bym iohlad ban wan skul man ka sngi bad ia ka bam ka dih ruh ka shu ioh tang ia kaba tam bad kaba la tam kyntait ka Teilang bad ka Lumlang bad ka Meiheh jong ka, u la sngew synei bad hateng hateng u rah jingbam phylla eiei ba kan bam. Naduh ba ka Pdianghun, ka la ia ithuh ithaw ia u Nangbha, wat lada kam shym la iohlad ban wan skul man ka sngi pynban ia ki note ba ai ki nonghikai ha skul, ka ioh kopi biang biang na u Nangbha.

Shibnai shwa ka examin kutsnem ka Pdianghun, kam shym la iohlad ban wan skul wat shisien ruh na ka daw ki kam iing kam sem. Haba ka Pdianghun kam shym la wan skul, kaei ka jingjia ia u Nangbha? U la long la kum u khynnah uba shiteng khlieh um sngewthuh shuh ia ka jingbatai kot jong ki nonghikai. Haba u don ha iing ruh u la long kum uba bie j. Ha ka jaka ban khreh kot bha ba la jan ka examin kut snem, u shu lut por tang ha kaba mih mih rung rung na iing shabar nabar, sha poh iing. Ka jingbym wan skul ka Pdianghun, ka la pynlong ia u Nangbha ban kylli bun jait lehse ba ka pang ne kumno?. “Long katba long kum u para klas ngan leit jngoh ia ka lashai ban tip ia ka daw ka la jia aiu ia ka kumne”, u la ong.

Ha ka sngi kaba bud u Nangbha u la wan jngoh ia ka Pdianghun, u da rah artat ia ka kopi note ba kan ioh ban bud bad ban khreh na ka bynta ka examin kut snem. Ka Pdianghun kaba tieng ioh ka shah mai ha ka Meiheh jong ka, ka Sngewbha, ka tang shu iohi ia u Nangbha ka da ong “Nangbha phi wan lei shane?”. “Nga shu kwah wan jngoh ia phi bad ban wan ai ia kane ka kopi note ba phin bud bad ba phin ioh khreh na ka bynta ka examin kut snem, naba ngam iohi shuh ba phi wan skul” la ban ktien u Nangbha. Nangta u la kylli “Balei phim shah seh ia nga ban wankai sha iing jong phi?”. “Balei ym shah, shah beit keiñ”, la ong ka Pdianghun tangba nga tieng ioh nga shah mai shah kynhit ha ka Meiheh”, ban shuh shuh ka Pdianghun.

Ha ka jingwan jngoh u Nangbha, u iphylla ia ka jingkylla dur jong ka Pdianghun na ka jingsaw hoiñ-hoiñ sha ka liehblat blar blar, la katta ruh um shym la kylli bun ktien, hadien ba u la ai ia ka kopi note ba kan bud note ba kan ioh khreh ha iing bad u leitnoh artat sha la iing. U Nangbha, tang shu poi ha iing ha ka jaka ban khreh kot, u shim ia u khulom bad ka kot sada u thoh shithi sha ka Pdianghun. U phah ia ka ban ia kynduh ia u, naba u kwah ban tip ia ki jingeh, jingkluslai jong ka, kaba la ktah ia ka haduh ba ka la kylla dur na ka jinglong ba saw hoiñ-hoiñ sha ka liehblat blar blar.

Ka Pdianghun, ka tang shu ioh ia ka shithi na u Nangbha ka la pyrkhat halade shiphang arphang da kaba ong “Ngan iohlad ne em ban mih na iing ban leit ia kynduh ia u Nangbha?, Ngan leit la ka leit”, ka la ong. Ka Pdianghun kumba ka ju leit skul shisien shitaiew, ka la khreh wut wut bad mihnoh artat shisyndon na iing. Ha ki sngi kiba bun ka jingleit skul jong ka Pdianghun, ka bam por tang kumba lai kynta eiei, hynrei ha kane ka sngi pat ka la bam por haduh saw kynta shiteng bad kane ka

jingiah slem jong ka Pdianghun, ka la pynsuba sniew bun jait ia ka Meiheh jong ka.

Ha ka jingwan poi slem sha iing ka la jia aiu ia ka Pdianghun?. Ka tang shu rung ha iing ka Meiheh, ka la kylli ia ka Pdianghun ba ka wan na ei. Ka Pdianghun ka la pyrshang ban kyrda dohiap ialade da kaba ong ba ka wan bud kopi note na ki paralok jong ka, katba ka Meiheh jong ka pat kam sngew iahap bad kam lah ngeit ba ka jingleit bud kopi note na ki paralok jong ka ka bam por haduh saw ne san kynta. Shuh shuh ka meiheh, ka la ong ba ka Teilang bad ka Lumlang ruh ki shait leit bud kopi note na ki paralok tangba kam bam por kumba bam ka Pdianghun. "Ngam sngewlah ngeit, tip pha leitkai shano re shano", la ong ka meiheh. Nangta ka la ban shuh shuh da kaba ong "Kat kum ka jingiaathuh jong ka Teilang bad ka Lumlang, ba naduh mynhynnin ka janmiet wat shikti ruh pham nangtrei nangktah shuh bad ia ka jingtrei kam iing kam sem la trei tang da ka Teilang marwei". Nangta ka meiheh, ka la sdang ka mai ka kynhit, ka sin ka rangop, ka kynshi ka kyneh kaba laiphew jait ia ka Pdianghun.

Haba la shah mai, ka Pdianghun, ka iam bad kynmaw ia ki sngi ha kiba ka dang don hapneh i mei. "Ah! ba ngan dang don i mei la jong kan ym wan jia ia nga kumne, wat lada ngi duk tasam katno katno ruh, hynrei ka suk ka jingim" la kren bynfiaw ka Pdianghun hala marwei marwei. Nangta ka Pdianghun ka la ong shuh shuh "Ba pleng haba ym don shuh imei lajong ka Meiheh, kam fiiew shuh ia nga kum ka khun ne shakri pynban la kum ka mraw syndon,". Naduh ba shah mai shah kynhit ha ka meiheh, ka Pdianghun kam nang shuh ia ka trei ka ktah ka shu shong sngewsih sngewdiaw marwei. Ka meiheh jong ka haba ka iohi ba ka Pdianghun, ka shu shong sngewsih, khlem trei khlem ktah ka la kynhit dar "Pleng kum kane seh ka

jinglong jong pha?. Nga nang tharai ba pha trei ia ki kam iing kam sem pynban pha shu shong jaipdeh bad shong klikti kumne”.

## **SHAH BEH KA PDIANGHUN NA IING KA SNGEWBHA.**

Wat lada ka Pdianghun, ka la iathuh ha ka meihah ba ka la dep ia ki kam iing kam sem bad ka dang shu shongthait shwa ban khreh kot, ban pynkhreh ialade na ka bynta ka examin final kut snem, hynrei ka jingiatuh ka Pdianghun, ka shu long lehnohei. Ka Meihah, ka la khie bitar lep ka da ong artat “Pleng pha da pyrshang ban pynksan ialade?. Mih klois shisyndon na iing, mih bak bak mynta kumne” ban ktien shuh shuh ka Sngewbha.

Ka Pdianghun, ka bapli kaba la iap kmie haba ka la shah beh na iing da ka meihah jong ka, kam tip shano ban leit bad shaei ban phet bad ka la shu ieng sah marwei ha shangkah-khim (shabar na ka compound jong ka iing). Kaei keiñ ka jingpynshitom kaba ka meihah jong ka ka la pynshitom ia ka Pdianghun?. Ka meihah, ka la shah biang ia ka ba kan sah ha iing jong ka tangba ka jingpynshiton ka long ba naduh kata ka sngi, ka Pdianghun kam iohlad shuh ban leit skul wat tang shisien shitaiew bad ka la hap ban trei ban ktah ia ki kam iing kam sem baroh baroh shisngi. Mynmiet katba kiwei ki leit thiah, ka Pdianghun pat marwei ha kamra pdeng bad ka iam artat. Katba ka dangiam mih ki jingrwai sngewsih haba ka kynmaw ieid iala i mei. Katba ka dangiam sngewsih ka iohthiah syndet man ka por ha jrong shuki ha kamra pdeng.

U Nangbha, u para class jong ka haba u iohi ba ka Pdianghun, kam shym la wan poi shuh sha skul, u la kieng ka khlieh. Ha skul u la long kum uba shiteng khlieh bad um lah shuh ban pynshah skhor ia ka jingbatai kot jong ki nonghikai. Ha iing ruh um nangthiah nangdem shuh u la long kum u bieji. Ha ka

jaka ban khreh kot ba la jan ka examin kut snem, u shu lang-a pisa mynsiem halade marwei u da kylli artat halade “Balei sha ka Pdianghun kam shym la wan poi shuh sha skul?”. U Nangbha, u shim ĩa u khulom bad ka kot sada u thoh shithi sha ka Pdianghun.

Ka Pdianghun, ka tang shu ioh ĩa ka shithi na u Nangbha ka la jubab shisyndon da kaba ong “Ngam lah ban ĩathuh lut ĩa ki jingeh jong nga tang da ine i shithi bad lada ngan ĩathuh ruh phim lah ban mutdur. To ngin sa ĩa kynduh lashai ha Lailad kumba nga leit siew baiskul, tangba ban leit skul te ngam iohlad shuh. Ap ĩa nga ngin sa ĩa kynduh lashai ho!” la pynkut ka shithi jong ka Pdianghun sha u Nangbha.

U Nangbha, ha kane ka sngi u pep skul na ka daw ba u ap ĩa ka Pdianghun. Naduh dangstep u ud ba um sngewshait la katta ruh tang shu sdang kynrong sngi u mih shabar haduh Lailad ban ap ĩa ka Pdianghun. Ha kane ka jingĩakynduh kaba para marwei ki la iohlad ban ĩa kren kham bha bad buh sngi ban ĩa kynduh ha jaka tong um, ka jaka kaba kham kynjih na ĩing ki briew.

Ha kane ka sngi u Nangbha, u pep skul na ka daw ba la ĩa kut bad ka Pdianghun, ban ĩa kynduh ha ka jaka tongum. Ha kane ka sngi ruh u Nangbha, dangstep u ud ba um sngewshait ba jur ba ĩiun ka met ka phat, la katta ruh tang shu sdang kynrong sngi u mih thadsngi ĩalade ha mynshem. Katba u dang thadsngi u leh mynleh kumba jied maw tyrlot ban leit siat sim bad leit artat sha ka jaka tongum kaba ju leit tongum ka Pdianghun. Katba ym pat wan tongum ka Pdianghun, u Nangbha, u leh mynleh kumba leit siat sim. Ki kynthei ki khynnah kiba wan kiba leit tongum kim suba eiei ba u ap ĩa ka Pdianghun. Kum juh ki briew kiba ĩaid kiba ĩeng sharum shaneng kim don jingmut da kumwei, baroh ki tharai bad mut ba u Nangbha, u leit siat sim. Ka jingleh mynleh siatsim jong u ka shu long tang ban shu tep eitmiaw ĩa ka jingĩadei kam jong u bad ka Pdianghun. Tang



ĭa ka jingĭadei kam jong u bad ka Pdianghun. Tang mar ĭa wan poi tiak ka Pdianghun ha ka jaka tongum, u Nangbha, u la ĩar mar mar sha jaka tong um bad katba dang don ki kynthei ki khynnah kiba pdiang um, u leh mynleh kumba sait kjat saikti katba ka jingĭakren jong u bad ka Pdianghun, ka la ĭaid sha jngai.

Ha kane ka jingĭakynduh kaba tang arngut hi ha ka jaka tongum ka Pdianghun, ka la iohlad ban ĭathuh lut phoiĭ ĭa ki jingeh kiba ka la ĭa kynduh ha ka jingim jong ka naduh ka por ba khlad ka kmie haduh ba ka don ha ĭing jong ka Meiheh jong ka. Ha kane ka jingĭakynduh ka la ĭathuh lut ha u Nangbha, ĭala ka jinglong khunswet bad ĭa ka jingshah lehbeiĭ jong ka, ha ka Meiheh jong ka, kaba tang shu bakla tiak ka la shah mai shah shoh, shah bom ha ka Meiheh jong ka. Siaw siaw ha ki tyndong skhor u Nangbha, ka ĭathuh bad namar ka jingieid jong ka ĭa u Nangbha, kam banse ban ĭathuh ĭa kita baroh ki jingjia bad kam banse ban shah naba shano kan leit bad shaei kan phet na ĭing ka Meiheh jong ka. Ka Pdianghun, katba ka nang ĭathuh ĭa kita ki jingeh, tuid artat ki umkhmat brop shi brop na ki ngap jong ka.

U Nangbha, haba u la sngewthuh ĭa ki jingeh jong ka Pdianghun, u la pyntngen bad ĭiat ĭa ki ummat kiba tuid na ki ngap jong ka bad u da ong artat. "Pdianghun, wat sngewsih than, lada phi ĭeid shisha ĭa nga kumba nga ĭeid ĭa phi bad lada phi don jingmut kumba don ma nga, ngan sa ĭathuh ha i mei i pa ba kin khot ĭa phi sha ĭing jong nga bad ba kin ri kin sumar ĭa phi kumba ki leh ĭa nga. Hato phi ĭeid mo seh ĭa nga kumba nga ĭeid ĭa phi?".

Kat ban kut ka parom hapdeng u Nangbha bad ka Pdianghun ka por ka la ĭaid jngai. La katta ruh naba ka sait ka khlieng, ka shut khiew shut pliang artat bad katban kut ka parom ki tiar ki tar ruh ki la phynai hi khriak. Ka Pdianghun, namar

ba ka wan slem tang shu poi ha iing tiak ka la shah mai bad shah beh shisyndon na iing da ka Meiheh jong ka bad ka da ong artat “kumne shi kumne pha wan miet te ngam sngewthikna shuh. U ei uto uba pha ia juh ia jan. Nga iohi man ka por ba pha ia iaaid lang”. Ka Pdianghun, ban iada ialade ka iathuh ba u dei u para klass jong ka. Ka meiheh, ha ka jaka ban sngap ia ka jing’iathuh jong ka Pdianghun, ka kynhit pynban dar. “Haba nga la dep pynheh pynsan, pynkhynraw-pynkhyllud ia pha te kumta hi keiñ pha la sdang ban ia nud bad nga” la ong ka meiheh. Shuh shuh ka Meiheh, ka la kren halade “Tangba ka pyrthei mynta te yn ong pat da kumno haba ki la heh la samla kim ñiewkor ñiewburom shuh ia kiba la pynheh pynsan ia ki”.

## KA PDIANGHUN HA IING U NANGBHA.

Ka Pdianghun, kaba la sngewthikna ba kiba ha iing ha sem jong u Nangbha, ki kloï ban khot iing ia ka ha kano kano ka por, ha shwa ba kan mih na iing ka Meiheh jong ka (ka Sngewbha) ka la ong “Ymdei meiheh, ba nga ia nud ia phi ne ba ngam ñiewkor bad burom ia phi, nga da burom bad ñiewkor eh, tangba ngam banse ban pynphai ktien, haba phi hi dalade pylleiñ pylleiñ phi la leh arsap ia nga. Shyrkhei phi i beiñ ia nga tang shu bakla tiak phi la mai sih mai sang ia nga. Nga da sngewnguh eh ia phi, ba phi la ri la sumar ia nga ha kine ki phra snem kiba la leitnoh bad mynta ngam kwah ban pynshitom jingmut ia phi, ym leilei ka bha ia nga ba ngan mihnoh nangne na phi ba phin suk”. Ka Pdianghun, ka la khot ia ka Teilang bad ia ka Lumlang ban ai khublei khatduh bad ka da ong artat “Khreh kot minot bha, leh tipsngi bad nga kymmen kan ym jia ia phi kumba jia ia nga”. Ka Pdianghun ka kren halade marwei “SA TANG KA JYNJAR LANO YN SUK” ka ai khublei bad ka mih noh artat na iing.

Ka Pdianghun, ka la mih na iing hynrei kam tip shano ban leit bad shaei ban phet ba kan leit sha iing jong ka kaba la iehap ka kmie ruh ka la jot la pra sa artat ba jngai ka lynti ba kan sahmiat sha iing ki briew ruh ka sngew kum re lane sha iing u Nangbha u para klass jong ka, kat shaba phai ki jingeh suda. Ha ka jingsngewsih sngewdiaw bad ka iam artat, ka shu ieng marwei weibriew ha lynti Tyngkahkhim (shabar na ka compound jong ka iing) ha ka jingdum jong ka miet.

Ka Pdianghun, katba ka dang ieng weibriew ha ka jingdum jong ka miet, kumno re kumno jia ryngkhat ba ka kmie jong u Nangbha ka kum iaid lynti nangta bad ka la ia kynduh ngong, la katta ruh kam shym la kylli ia ka Pdianghun ba ka la jia aiu, naba kam kwah ban lorni ia ka kam iing kam sem jong ki briew. Ha ka juh ka por ruh ka tip bha ia ka jinglong ka akor jong ka Meiheh jong ka Pdianghun, ba ka dei ka briew kaba eh ktien. Ia ki khun lajong ruh kam salia katno tam ia ka Pdianghun bapli ka khun swet ka bym dei ka khun kaba mih na ka doh na ka snam jong ka.

Ka kmie u Nangbha, kaba dap da ka mynsiem sngewsynei ia ka Pdianghun, ka khunswet kaba la iap kmie kam lah ban kun halade khlem da iathuh ha iing shaphang ka Pdianghun, kaba iam slot shislot bad ieng marwei ha lynti tyngkahkhim. U Nangbha, u para klass jong ka bad uba la don jingieid ia ka Pdianghun, tang shu iohsngew ba iathuh ka kmie u mih bran shisyndon na iing ban leit ia kynduh bad pyntngen ia ka. U Nangbha hadien ba u la ia kynduh ia ka Pdianghun u la leit iathuh ha ka Meiheh jong ka bad u la kyrpad ia ka ba kan leit khot ia ka sha iing, phewse na ka liang jong ka Meiheh ka Pdianghun kam pynsngew ciei ia kane ka jingkyrpad jong u Nangbha, u para klass jong ka Pdianghun.

Hadien ba ka Pdianghun ka la mih na iing, kaei kaba la jia ha iing ka Meiheh jong ka?. Mih satang ki jingkulmar suda, ym dep shuh ka kam iing kam sem, ka shet ka tieu, ka sait ka khlieng, ka um ka wah, sahkhlaw ka shakiar ka lymmiah, tngit ka mynshem ka tyngkong iing bad kum ban shu ong noh, la dkoh lut baroh ki kam iing kam sem. Ha ka juh ka por ka Teilang ka khun nyngkong jong ka Meiheh kaba ka kheif tipsngi, ka la armet la kumba san bnai eiei khlem da tip ki kmie ki kpa bad ka ioh da u briew uba ym sngewbha ki kmie ki kpa. Ka Sngewbha, ka kmie jong ka Teilang ka tang shu tip ba ka khun jong ka, ka Teilang ba ka la punkhun la kumba san bnai eiei khlem da iathuh ia ki kmie ki kpa bad namar ka jingset pap jong ka, ka la shah beh shisyndon na iing.

Ka Pdianghun, ka khunswet kaba im tang da ka jingklusai bad ka jingjynjar suda ka la raikut ban aiti ialade ha u Nangbha bad ban bud ia u. U Nangbha ruh namar ba u dei briew uba bha, u khun riewspah ki briew, da ka jingsngewbha jong ki kmie ki kpa, u la shim lok ia ka Pdianghun da ka jingieid bad da ka jingkhuid mynsicm. Dei naduh kane ka sngi ba ka Pdianghun ka la ioh jingsuk.

## KA TEILANG HA IING KA PDIANGHUN.

Ka Teilang ka khun nyngkong jong ka Sngewbha (ka Beiheh jong ka Pdianghun) kaba la ioh lok (ioh kurim) khlem da tip ki kmie ki kpa bad artat ba ka ioh da u briew uba ki kmie ki kpa kim sngewbha bad sngewtynn timer ka la shah beh noh na iing. Ka Teilang ka mih na iing da ka jingbymbanse. Ka Teilang kam tip shano ban leit bad sha ei ban phai laitnoh satang sha ka Pdianghun. Ka la leit pan map na ka Pdianghun bad kyrpad ia ka ba kan shah ia ka ban sah ha iing jong ka. Ka Pdianghun ka briew ka babha kaba don ka mynsiem sngewlem ka la sngew synei ia ka bad da ka jingieid ka la khot iing ia ka bad pdiang ia ka kum ka

kam tip shano ban leit bad sha ei ban phai laitnoh satang sha ka Pdianghun. Ka la leit pan map na ka Pdianghun bad kyrpad ia ka ba kan shah ia ka ban sah ha iing jong ka. Ka Pdianghun ka briew ka babha kaba don ka mynsiem sngewlem ka la sngew synei ia ka bad da ka jingieid ka la khot iing ia ka bad pdiang ia ka kum ka hynmen trai lajong da kaba klet ia kiei kiei kiba ka Teilang ka la leh ia ka.

Ka Sngewbha (ka meihch jong ka Pdianghun) hadien ba la tip ba ka khun jong ka ka Teilang ka kham sniew ban ia ka Pdianghun, ka la wan sha iing jong ka Pdianghun ban pan map artat iala ka jingbakla ba ka shu beh ia ka Pdianghun khlem daw na iing jong ka. Ka Pdianghun ka briew ka babha ka khlem buhnud eiei ia ka jingleh jong ka meihch jong ka, ka da map ia ka naduh ka mynsiem bad klet ia baroh ki jingjia kiba la dep jia.

Ha iing ka Pdianghun, da ka jingbym poi pyrkhat,ka Sngewbha ka la ia kynduh ia ka Teilang kaba trei bylla sngi ha iing ka Pdianghun. Ha kane ka jingiakynduh ki la ia map ia baroh ki jingbakla iwei ia iwei pat. Naduh kata ka sngi kine ki briew kiba im tang ha ka jynjar ki la shem jingsuk bad ki la ia shongsuk shongsain kum shi iing shisem. Ka parom ha kane ka kot ka ong "Tang ka jynjar lano yn suk". Hooid ka Pdianghun ka khunswet kaba la iap kmie ha kaba nyngkong ka la im ka jingim kaba jynjar trah, naduh dang khynnah hynrei ha kaba khatduh lyngba ka jingsumar sukher bad rihok u Nangbha ia ka, ka la ioh ia ka jingsuk.

\*\*\*\*





## **Da u juh u Nongthoh: -**

1. Ka History Lyngkot ka Parish Khliehriat
2. Ka History of the People of the Labang-Nongphyllut and Pangam-Raliang.
3. Ka Samla Labang.
4. U Joseph Bakhuid ka Nuksa ba mynna ka jingim babha.
5. Ka Khanatang u Hynniew Trep kat kum ka Saiñ pyrkhat ki Labang- ki Nongphyllut.
6. Ka Pynhiar Synjat lator bad ka shongkha shongman.
7. Sa Tang Ka Jynjar Lano Yn Suk.

**M.R.P. Rs. 20/-**

---

**Setting and Printing at:**

**NEW TECH PRESS, Bliss Complex, Lad Stadium, Ladthadlaboh,  
Jowai, Jaintia Hills, Meghalaya, Pin Code, 793150.**